

摛藻堂四庫全書薈要

史部

欽定四庫全書叢要

史部

宋史卷二百七十八



詳校官編修臣王天祿

欽定四庫全書  
舊要卷五千九百六

史部

宋史卷二百七十八

元中書右丞相總裁托克托等修

列傳第三十七

馬全義

子知節

雷德驤

子有終  
簡夫

孫孝先

王超

子德用

馬全義幽州薊人十餘歲學擊劍善騎射十五隸魏帥范延光帳下延光叛晉祖征之以城降悉籍所部來上

全義在籍中因補禁軍以不得志遂遁去漢乾祐中李  
守真鎮河中召置帳下及守真叛周祖討之全義每率  
敢死士夜出攻周祖壘多所殺傷守真貪而無謀性多  
忌克全義屢為畫策皆不能用城陷遂變姓名亡命周  
廣順初世宗鎮澶淵全義往事之從世宗入朝周祖召  
見補殿前指揮使謂左右曰此人忠於所事昔在河中  
屢挫吾軍汝等宜效之世宗即位遷右番行省從世宗  
戰高平以功遷散員指揮使從征淮南以功遷殿前指

揮使右番都虞候恭帝即位授鐵騎左第二軍都校領  
播州刺史宋初歷內殿直都知控鶴左廂都校領果州  
團練使從征李筠筠退保澤州城小而固攻之未下太  
祖患之召全義賜食御榻前問計對曰筠守孤城若併  
力急攻立可殄滅倘緩之適足長其姦爾太祖曰此吾  
心也即麾兵急擊之全義率敢死士數十人乘城攀堞  
而上為飛矢貫臂流血被體全義拔鎧臨敵士氣益奮  
遂克其城遷虎捷左廂都校領睦州防禦使又從征李

重進領控鶴虎捷兩軍為後殿賊平班師錄功居多改  
龍捷左廂都校領江州防禦使俄被疾太祖遣太醫診  
視仍諭密旨曰俟疾間當授以河陽節制全義疾已亟  
但叩頭謝數日卒年三十八特贈檢校太保大同軍節  
度使子知節

知節字子元幼孤太宗時以蔭補供奉官賜今名年十  
八監彭州兵以嚴泣衆衆憚之如老將又監潭州兵時  
何承矩為守鎮以文雅飾吏治知節慕之因折節讀書

雍熙間護兵博州契丹入邊敗我師於君子館先是知  
節完城繕甲儲積芻粟吏民以為生事既而契丹果至  
以有備引去徙知定遠軍時議調河南十三州之民輸  
餉河北轉運使樊知古適至軍議事知節曰軍少粟多  
簸其紅腐尚當得十之六七知古從之果獲粟五十萬  
斛分給諸屯遂省河南之役時部民入保避寇卒有盜  
婦女首飾者護軍止笞遣之知節曰民避外患而來反  
罹內寇此而可恕何以肅下即命斬之知深慶二州遷

西京作坊使旋知梓州李順之叛詔與劉繼恩同討賊繼恩恃勢自任惡知節不附已遣守彭州付以羸兵三百彭之舊卒悉召還成都知節累請益兵不從賊衆十萬攻城知節力戰自晨抵晡士多死慨然歎曰死賊手非壯夫也即橫槊潰圍出遲明援兵至復鼓譟入賊遂潰去太宗聞而歎曰賊衆我寡知節不易當也授益州鈴轄加益漢九州都巡檢使遷內園使會韓景祐帳下劉旰脅牙兵為亂連下州縣衆踰二千知節領兵三百

追至蜀州與戰旰走印州知節曰賊破印州必乘勝渡江薄我既息而後戰官軍雖倍制之亦勞不如乘其弊急擊之破之必矣遂行次方井鎮與旰遇殺之無噍類咸平初領登州刺史知秦州州嘗質羌酋支屬餘二十人踰二紀矣知節曰羌亦人爾豈不懷歸悉遣之羌人感之訖終更不犯塞時州有銀坑歲久鑛竭課額弗除主吏破產償之不足知節請蠲之章三上乃允遷西上閣門使知益州兼本路轉運使自乾德後歲漕蜀物動

踰萬計時籍富民以部舟運坐沉覆破產者衆知節請  
代督以省校而程其漕事自是蜀人賴以免患徙知延  
州兼鄜延駐泊部署邊寇將至方上元節遽命張燈啓  
闕累夕宴樂寇不測即引去會鎮州程德元政事曠弛  
徙知節代之詔發澶魏等六州糧輸定武時兵交境上  
知節曰糧之來是資盜也止令於舟車所至收之寇無  
所得而遁車駕在澶淵時王超擁兵數十萬屯真定逗  
留不進知節移書謂讓之超始出兵猶以中渡無橋為

辭知節預命度材一夕而具景德中徙知定州未幾拜  
東上閣門使樞密都承旨擢拜簽書樞密院事當是時  
契丹已盟中國無事大臣方言符瑞而知節每不然之  
嘗言天下雖安不可忘戰去兵以為戒自陳年齒未衰  
五七年間尚可驅策如邊方有警願預其行但得副都  
部署名及良馬數匹輕甲一聯足矣上以為然因命製  
銅鐵鎖子甲以賜焉進宣徽北院使加兼樞密副使時  
王欽若為樞密使知節薄其為人遇事敢言未嘗少屈

每廷議得其不直輒面詆之時欽若寵顧方隆知節愈  
不為下大中祥符七年出為潁州防禦使知潞州天禧  
初移知天雄軍召拜宣徽南院使知樞密院事以疾乞  
罷除彰德軍留後知貝州兼部署將行真宗聞其癯瘁  
止命歸鎮時上黨大名之民已爭來迎謁未幾卒年六  
十五贈侍中謚正惠知節將家子慷慨以武力智謀自  
許又能好書賓友儒者所與善厚必一時豪傑論事饗  
譽未嘗有所顧忌故聞其風者亦知其為正直云

雷德驤字善行同州郃陽人周廣順三年舉進士解褐  
磁州軍事判官召為右拾遺充三司判官賜绯魚顯德  
中入受詔均定隨州諸縣民田屋稅稱為平允宋初拜  
殿中侍御史改屯田員外郎判大理寺其官屬與堂吏  
附會宰相趙普擅增刑名因上言欲求見太祖以白其  
事未引對直詣講武殿奏辭氣俱厲太祖詰之德驤對  
曰臣值陛下日旰未食方震威嚴爾帝怒令左右曳出  
詔置極典俄怒解黜為商州司戶參軍刺史知德驤舊

為省郎以客禮之及奚嶼知州希宰相旨至則倨受庭  
參德驤不能堪出怨言嶼銜之適有言德驤至郡為文  
訕上者嶼召德驤與語潛遣吏給其家人取得之即械  
繫德驤具狀以聞太祖貸其罪削籍徙靈武數年其子  
有鄰擊登聞鼓訴中書不法事趙普由是出鎮河陽召  
德驤為祕書丞俄分判御史臺三院事又兼判吏部南  
曹開寶七年同知貢舉太祖崩以德驤為吳越國告哀  
使還遷戶部員外郎兼御史知雜事改職方員外郎克

陝西河北轉運使歷禮部戶部郎中入為度支判官太平興國四年車駕征太原為太原西路轉運使六年同知京朝官考課俄遷兵部郎中七年以公累降本曹員外郎出知懷州未幾復舊官又命為兩浙轉運使其子殿中丞有終亦為淮南轉運使父子同日受詔搢紳榮之俄遷右諫議大夫雍熙二年徵歸朝同知京朝官考課初帝謂宰相曰朕前日閱班籍擇官為河北轉運使所患不能周知羣臣履行自今令德驤錄京朝官履歷

功過之狀引對既得漸識羣臣擇才委任且使有官政者樂於召對負瑕累者耻於顧問可以為懲勸矣端拱初遷戶部侍郎會趙普再入相宣制之日德驤方正班不覺墜笏遽上疏乞歸田里太宗召見安諭之賜白金三十兩罷知考課止以本官奉朝請會議事尚書省乘酒叱起居員外郎鄭構為盜御史奏劾下御史臺案問具狀帝止令罰月奉而釋之訖趙普出守西洛帝終保全之淳化二年為其婿如京副使衛濯訟有鄰子秘書

省校書郎孝先內亂帝素憐德驤忽暴揚其醜不以孝  
先屬吏止除名配德均州德驤坐失教責授感德軍行  
軍司馬并其子少府少監有終責授衡州團練副使德  
驤因慚憤成疾二年卒年七十五有終為三司鹽鐵副  
使表乞追復舊官從之德驤無文采頗以強直自任性  
褊躁多忤物不為士大夫所與有鄰開寶中舉進士不  
第其父既竄靈武意宰相趙普擠抑之時堂後吏胡贊  
李可度經職歲久或稱其請託受賄而祕書丞王洞與

德驤同年登第有鄰每造謁洞洞多以家事委之一日  
洞令有鄰市白金半錠因曰此令吾子知要與胡將軍  
蓋謂贊也時又有招應攝官三任詳由全者許投牒有  
司即得召試錄用有鄰素與前攝上蔡主簿劉偉交游  
知偉雖嘗三攝而一任失其解由偉造偽印令其兄前  
進士侁書寫之因是得試遇銓遂具章告其事並下御  
史府按鞫有鄰出入贊家証其事多實獄具偉坐棄市  
洞等並決杖除名贊可度仍籍其家有鄰授祕書省正

字賜公服靴笏銀鞍勒馬絹百疋自是累上疏密告人  
陰事俄被病白晝見偉入室以杖筮其背有鄰號呼聞  
于外數日而死賜德驤錢十萬以給喪事

有終字道成幼聰敏以蔭補漢州司戶參軍時侯陟典  
選木彊難犯選人聽署於廷無敢譁者有終獨抗言願  
為大郡治獄掾陟叱之曰年未三十安可任此官有終  
不為沮署來蕪尉知監左拾遺劉祺以有終年少頗易  
之有終發其姦贓祺坐罪杖流海島以有終代知監事

先是三司補吏為治官率以貲進多恣橫至是受署者  
憚有終率多避免太宗即位聞其名遣內侍伍守忠同  
掌監事且察其治迹守忠至裁周月即還奏有終彊濟  
之狀亟詔為大理寺丞會德驤任陝西轉運奏為解州  
通判特許德驤不巡察是州有終入奏鹽池利害改贊  
善大夫令還權知軍事省通判太平興國六年遷殿中  
丞知密州徙淮南轉運副使賜緋魚改太常博士時德  
驤主簿兩浙往往省于境上時人榮之雍熙中王師北

征命為蔚州飛狐路隨軍轉運使入為鹽鐵判官歷戶  
部度支副使賜金紫出知昇州淳化初就遷少府少監  
知廣州二年女弟婿衛翟訟其家法不謹有終坐親累  
責授衡州團練副使奪章服俄丁外艱行及許田召歸  
入對賜錢八十萬起為都官員外郎歷度支鹽鐵副使  
復金紫時以江南嶺外茶鹽價不一細民冒禁私販多  
陷重辟詔有終領江淮兩浙荆湖福建廣南路茶鹽制  
置使就出鹽產茶之地以便宜裁制使還改工部郎中

知大名府不踰月復為少府少監徙知江陵李順之亂  
王師西征命與裴莊為峽路隨軍轉運使同知兵馬事  
調發兵食規畫戎事皆有節制師行至峽中遇盜格鬪  
衆渴乏會天雨軍士以兜牟承水飲之且行且戰進至  
廣安軍壘瀕江三面樹柵會夜陰晦賊衆奄至皷譟舉  
火士伍恐懼有終安坐櫛髮自若賊圍既合有終引奇  
兵出其後擊之賊衆驚擾赴水死者無算就拜右諫議  
大夫知益州次簡州寓佛舍度賊必至命左右重閉召

土人嚴更警備初夕間道而出賊圍守數重及壞寺入  
惟擊柝者在焉俄兼同招安使賊平改知許州三年改  
給事中知并州真宗嗣位加工部侍郎咸平二年代還  
知審刑院俄授戶部使三年將巡師大名遣有終乘驛  
先詣澶州督納糧草車駕還次德清軍會益州奏至神  
衛戍卒以正旦竊發害兵馬候轄符昭壽擁都虞候王  
均為亂逐知州牛冕即日拜有終瀘州觀察使知益州  
兼川峽兩路招安捉賊事御厨使李惠洛苑使石普供

備庫副使李守倫並為招安巡檢使給步騎八千命往招討又以洺州團練使上官正為東川都鈐轄西作坊使李繼昌為峽路都鈐轄崇儀副使高繼勲王阮並為益州駐泊都監供奉官閭門祇候孫正辭為諸州都巡檢使正月三日均率衆陷漢州進攻綿州旬日不能下趣劒門先是知劒州祕書丞李士衡度寇必至城不能守悉徙官帑保劒門焚其倉廩及署榜招軍卒之流逸者得數十人已而賊果至士衡與劒門都監左藏庫副

使裴臻逆擊之時風雪連日均衆無所掠惟食敗糟臻  
與戰斬首數千級賊衆疲劇宵遁還保益州士衡即馳  
騎入奏上嘉之拜士衡度支員外郎賜緋臻崇儀使領  
峯州刺史仍舊職知蜀州供奉官閻門祇候楊懷忠聞  
變即調鄉丁會一路巡檢兵刻期進討蜀民不從賊  
者相率抗禦儕伍謂之清壇衆擇清壇之魁七十餘人  
悉補巡檢將遣判官高本馳驛以聞十七日懷忠率衆  
入益州焚城北門至三井橋時均尚留劖門與賊將魯

麻胡陣于江瀆廟前自晨至晡戰數合懷忠兵勢不敵退還所部懷忠部下多李順舊黨頗貪剽劫故敗績焉懷忠移文嘉眉七州調軍士丁男來會二月再攻益州時均方遣逆黨趙延順攻邛蜀懷忠逆與之戰賊稍退懷忠與轉運使陳緯麾兵由子城南門直入軍資庫與緯署其庫籥均衆皆銀槍繡衣為數隊分列子城中賊兵出通遠門與懷忠戰數合會暮懷忠復退軍猝橋背水列陣砦櫛木橋南以扞邛蜀之路賊故不復能南畧

自清水壩溫江金馬三道來攻檣木砦出官軍後焚江  
原神祠斷功蜀援路懷忠三路分兵以抗之斬首五百  
餘級驅其餘衆入阜江獲甲弩甚衆乘勝逐賊至益州  
南十五里砦于鷄鳴原以俟王師均亦閉成都東門以  
自固是月有終等至令石普先與綿漢都巡檢張思鈞  
收復漢州進壁升儂橋賊出攻砦有終擊走之一日均  
開城偽為遁狀有終與上官正石普率兵徑入官軍分  
剽民財部伍不肅賊閉關發伏布床榻於路口官軍不

得出因為所殺有終等緣堞而墜李惠死之退保漢州  
益州城中民皆奔逃四出復為賊黨分騎追殺或囚繫  
之支解族誅以恐衆又脇士民僧道之少壯者為兵先  
刺手背次髡首次黥面給軍裝令乘城與舊賊黨相間  
有終署榜招之至則署其衣袂釋之日數百人三月進  
攻彌牟砦斬首千餘級復為賊所拒四月賊由升儂橋  
分路來寇併軍於東偏有終率兵逆擊大敗之殺千餘  
人奪其繖蓋金槍等物均單騎還城有終遣其子奉禮

郎孝若馳奏上召孝若問敗賊之由笑謂左右曰均鼠  
竊爾雖嬰城自守計日可擒矣孝若因言嘗習武藝願  
改秩以効即補供奉官俄以刑部員外郎馬亮為轉運  
使國子博士張志言副之供備庫副使張昫為綿漢都  
巡檢使楊懷忠又分所部砦於合水尾浣花等處樹機  
石設籠籬以拒之賊自升僥之敗徹橋塞門官軍進至  
清遠江為梁而度有終與石普屯於城北門之西依壕  
為土山分設鹿角又得舊草塲造梯衝洞車攻具普專

主之高繼勲張昫孫正辭攻城東上官正李繼昌王阮  
攻城西楊懷忠與巡檢殿直閻門祇候馬貴攻城南賊  
將趙延順盡驅兜黨以拒既而延順中流矢死又遣其  
黨丁重萬立城門上官軍射之殪每攻城輒會雨城滑  
不能上官軍及丁夫為洞屋以進賊又鑿地道出掩之  
溺濠中死者千餘軍勢小衄時方暑濕軍士多疾有終  
市藥他州療之是月詔洛苑使入內副都知秦翰為兩  
川捉賊招安使有終與翰叶議於城北魚橋又築土山

八月克城北羊馬城遂設鴈翅敵棚覆洞屋以進逼羅  
城九月城北洞屋成賊對設敵樓以抗官軍有終遣卒  
焚之賊自是銷沮築月城以自固有終募敢死士間道  
以入賊為藥矢中者立死有終令卒蒙氈秉燧以入悉  
焚其望櫓機石先遣東西南砦鼓譟攻城有終與石普  
分主洞屋以進普穴城為暗門門成賊攢戟於前無敢  
進者有二卒請行許以厚賞乃麾戈直衝之賊鋒稍却  
遂入城有終登城樓下瞰賊之餘衆猶砦天長觀前於

文翁坊密設礮架高繼勲白于馬亮請給楷秆油瓶衆執長戟巨斧秉炬以進悉焚之楊懷忠焚其砦天長觀前追至大安門復敗焉是夕二鼓均與其黨二萬餘南出萬里橋門突圍而遁有終疑有伏遣人縱火城中詰朝與秦翰登門樓牙吏有受偽署官職者捕得立樓下傍積薪厝火其上索男子魁壯者令辨之曰某嘗受某職即命左右猝投火中自晨至晡焚死者數百人時謂冤酷均既走度合水尾由廣都畧陵榮趣富順監所過

斷橋塞路焚倉庫而去初有終遣懷忠領虎翼軍追之  
後二日石普繼往以全軍為後援十月均至富順其將  
校以筏度江趨戎瀘蠻境朝廷每歲孟冬朔詔富順監  
具酒肴犒內屬蠻酋是日裁設具而均黨適至皆食焉  
聞懷忠追騎將至均心易之謂其黨曰速降懷忠令其  
衆負擔以行懷忠距富順六十里於楊家市少憩賊衆  
在後者邀戰懷忠遣騎士歷高原覘賊且語其左右曰  
縱賊度江後悔無及聞石侯將至當以奇兵取之乃臨

江列陣擊之餘黨散走有拏舟將度江而遁者懷忠合  
強弩射之溺死甚衆懷忠張旗鳴鼙入城均方在監署  
中其衆多醉均窮蹙縊死虎翼軍校魯斌斬其首詣懷  
忠獲僭偽法物旌旗甲馬甚衆擒其黨六千餘人逆徒  
殲焉懷忠旋軍出北門石普之衆方至奪均首馳歸成  
都梟于北市均本隸開封散從直後補軍校初神御軍  
之戍成都者以均及董福分二指揮以領之福御衆有  
法部下皆優足均縱其下飲博軍裝亦以給費是歲車

駕幸河朔符昭壽與牛冕大閱於東郊蜀人趨視之二  
軍衣服鮮敝不等均衆因是慙憤益州知州與鈐轄二  
廩並禁旅為牙隊歲除冕以酒肴犒部士而昭壽既驕  
恣復肆侵虐冕亦寬弛無政故詰朝合起為亂神衛卒  
既殺昭壽是日成都官吏方相與賀正聞變皆奔竄牛  
冕與轉運張適縋城而出惟都巡檢使劉紹榮冒刃格  
鬪既而衆寡不敵叛卒尚未有主或欲奉紹榮為帥者  
紹榮攝弓罵曰我燕人也比棄鄉土來歸本朝豈能與

汝同逆汝亟殺我我肯負朝廷哉衆未敢動監軍王澤  
與均適至乃謂均曰汝所部為亂盍自往招安均既往  
叛卒即擁之為主紹榮自經死均僭號大蜀改元化順  
署置官稱設貢舉以張錯為謀主錯本名美太原舊卒  
後為神衛小校狡猾嘗歷戰陣粗習陰陽以熒惑同惡  
故勸均為亂均實憇慎無謀嘗言官軍若至我當先路  
出迎自陳被脇之狀錯聞之擇軍中子弟署寄班以防  
守均令不與人接見官軍圍城每射箭招誘及令均子

弟至城下均皆不之知得箭書錯悉焚之自起至敗所  
守止一城而已均初署親軍為天降虎翼後果為虎翼  
軍所殺賊既平遣承受供奉官楊崇勲乘傳告捷賜崇  
勲錦袍銀帶器幣有終加保信軍節度觀察留後以秦  
翰為內園使恩州刺史石普為益州團練使高繼勲王  
阮並為崇儀使孫正辭為內殿崇班李繼昌為獎州刺  
史張昫為供備庫副使楊懷忠為供備庫副使馬貴為  
供奉官是役也懷忠之功居最為石普所忌朝廷微聞

之遣寄班安守忠按視戰所盡得其功狀以故懷忠復遷崇儀使領恩州刺史四年有終代還命為涇原儀渭鎮戎路都部署辭不拜改知永興軍府徙秦州景德初徙為并副都部署賜黃金四百兩丁內艱起復契丹入寇上幸澶淵詔有終率所部由土門抵鎮州與大兵會既而王超桑贊逗撓無功惟有終赴援威聲甚振河北列城賴其雄張俄而契丹修好命還屯所就判并州召拜宣徽北院使檢校太保二年七月暴疾卒年五十

九贈侍中錄其子孝若為內殿崇班閣門祗候孝傑為  
內殿崇班孝緒為供奉官孝恭為侍禁親族門客給事  
輩遷補者八人有終倜儻自任不拘小節有幹局沈敏  
善斷不畏強禦輕財好施歷典藩閫能撫士卒豐於宴  
犒官用不足則傾私帑及榷錢以給之家無餘財奉身  
甚薄常所御者銅鞍勒馬而已第在崇仁里者德驤所  
創有終在蜀嘗貸備用庫錢數百萬奏納其第償之優  
詔蠲免為宣徽使特給廉鎮公用錢歲二千貫身沒之

日宿負猶不啻千萬官為償之王繼英在樞密頗忌有終進用屢言其在蜀及守邊厚費以收士卒心真宗不之信卒保護焉

孝先字子思有鄰子也舉進士試祕書省校書郎知天長縣以衛濯訟其內亂除籍配均州後復知宛丘縣李繼隆判陳州薦其能加試大理評事契丹內寇真宗幸大名孝先以部芻糧河北首至行在擢太常寺奉禮郎王均反益州隨季父有終進討孝先率先鋒與賊戰升

僂橋斬首數百得均金槍黃繖以獻改將作監丞李繼遷陷靈州朝廷調兵軍費多出於民關內大擾孝先請益募商人入粟塞下償以茶鹽召對稱旨命馳驛陝西與轉運使鄭文寶議立規畫後多施行累遷尚書屯田員外郎嘗建置三司拘收司以檢天下財利出入之數詔如其請知興元府坐保任失實降通判華州徙知鄆州宰相寇準舉換內園使知貝州會慈州民張熙載詐稱黃河都總管籍並河州郡芻糧數至貝州孝先覺其

姦捕繫獄孝先欲因為此竒功以動朝廷迫司理參軍  
紀瑛教熙載偽為契丹謀者號景州刺史兼侍中司空  
大靈宮使部送京師樞密院按得孝先所教狀謫澤州  
都監利虢三州改環慶路兵馬鈐轄知邠州踰年領昭  
州刺史為益州鈐轄再遷左藏庫使擢西上閣門使涇  
原路鈐轄兼知渭州復知邠州徙耀州以為領軍衛大  
將軍昭州刺史分司西京卒子簡夫

簡夫字太簡隱居不仕康定中樞密使杜衍薦之召見

以祕書省校書郎簽書秦州觀察判官公事既罷居長安自以處士起不復肯隨衆調官多為歧路求辟薦時三白渠久廢京兆府遂薦簡夫治渠事先時治渠歲役六縣民四十日用稍木數百萬而水不足簡夫用三十日稍木比舊三之一而水有餘知坊州徙簡州用張方平薦知雅州既而辰州蠻首彭士羲內寇三司副使李參侍御史朱處約安撫不能定繼命簡夫往至則督諸將進兵築明溪上下二砦據其險要拓取故省地石馬

崖五百餘里仕義內附擢三司鹽鐵判官以疾知虢同  
二州累遷尚書職方員外郎卒錄其子爵臣為郊社齋  
郎簡夫始起隱者出入乘牛冠鐵冠自號山長關中用  
兵以口舌捭闔公卿既仕自奉稍驕侈駒御服飾頓忘  
其舊里間指笑之曰牛及鐵冠安在

王超趙州人弱冠長七尺餘太宗尹京召置麾下及即  
位以隸御龍直淳化二年累遷至河西軍節度使殿前  
都虞候真宗嗣位以翊戴功加檢校太傅領天平軍節

度咸平二年秋大閱禁兵二十萬于東郊超執五方旗  
以節進退上御戎幄觀之面賜褒獎從幸大名與都虞  
候張進並為先鋒都大點檢傳潛逗撓得罪以超為侍  
衛馬步軍都虞候鎮州行營都部署又帥鎮定高陽關  
三路契丹入邊與戰于遂城西俘馘二萬計斬其裨王  
騎將十五人手詔褒美李繼遷陷清遠軍以超將西面  
行營之師禦之徙帥永興軍宰相言超材堪將帥遂以  
超帥定州路行營王繼忠副之尋加鎮定高陽關三路

都部署密遣中使賜以御弓矢許便宜從事加開府儀  
同三司檢校大尉咸平六年遼師大入超召鎮州叅贊  
高陽關周瑩率兵會定州瑩以非詔旨不至遼兵圍望  
都超贊率兵赴之陣于縣南六里繼忠在陣東偏契丹  
出其背遮絕糧道人馬乏困繼忠馳前與契丹戰超贊  
遂旋師繼忠孤軍沒焉上即遣劉承珪李允則馳往察  
退衄之狀且言鎮州副部署李福拱聖軍都指揮使王  
昇當戰先旋福坐削籍流封州昇決杖配隸瓊州景德

初上親巡澶淵召超赴行在復緩師期契丹遂深入會  
南北通好故薄其責止罷超三路帥為崇信軍節度使  
徙知河陽又移鎮建雄知青州卒贈侍中再贈尚書令  
追封魯國公謚武康超為將善部分御下有恩與高瓊  
同典禁旅嘗休假他適過營壘軍校不時將迎瓊即命  
箠罰超以為非公行不當加罪人稱其恕然臨軍寡謀  
拙於戰鬪子德用

德用字元輔超為懷州防禦使補衙內都指揮使至道

二年分五路出兵擊李繼遷超帥兵六萬出綏夏德用  
年十七為先鋒將萬人戰鐵門關斬首十三級俘掠畜  
產以數萬計進師烏白池他將多失道不至虜銳甚超  
按兵不進德用請乘之得精兵五千轉戰三日敵勢却  
德用曰歸師迫險必亂乃領兵距夏州五十里絕其歸  
路下令曰亂行者斬一軍肅然超亦為之按轡繼遷蹣  
其後左右望見隊伍甚嚴整莫敢近超撫其背曰王氏  
有子矣累遷內殿崇班以御前忠佐為馬軍都軍頭出

為邢洺磁相巡檢盜張洪霸相聚界上吏不能捕德用  
以氈車載勇士詐為婦人篩過邯鄲賊果來邀勇士奮  
出悉禽之徙督捕陝西東路盜賊相戒曰此禽張洪霸  
者皆相率逃去為環慶路指揮使尋以奏事忤旨責授  
鄆州馬步軍都指揮使歷內殿直都虞候殿前左班都  
虞候柳州刺史遷捧日左廂都指揮使英州團練使天  
聖初以博州團練使知廣信軍城壞久不治德用率禁  
軍增築之有詔褒諭徙冀州歷龍神衛捧日天武四廂

都指揮使康州防禦使侍衛親軍步軍馬軍都虞候召  
還又為并代州馬步軍副都總管遷殿前都虞候步軍  
副指揮使歷桂州福州觀察使章獻太后臨朝有求內  
降補軍吏者德用曰補吏軍政也不可與太后固欲舉  
之卒不奉詔乃止太后崩有司請衛士坐甲德用曰非  
故事也不奉詔仁宗閱太后閣中得德用前奏軍吏事  
奇之以為可大用拜檢校太保簽書樞密院事德用謝  
曰臣武人幸得以馳驅自効賴陛下威靈待罪行間足

矣且臣不學不足以當大事帝遣使者趣入院遂為副使久之以奉國軍節度觀察留後同知院事遷知院歷安德軍加檢校太尉定國軍節度使宣徽南院事趙元昊反德用請自將討之不許德用狀貌雄毅面黑頸以下白哲人皆異之言者論德用貌類藝祖御史中丞孔道輔繼言之且謂德用得士心不宜久典機密遂罷為武寧軍節度使徐州大都督府長史有言德用市馬於府州者上其券乃市於商人者言者猶不已降右千牛

衛上將軍知隨州州置判官家人皆惶恐德用舉止言色如平時惟不接賓客而已徙知曹州或謂德用曰孔中丞害公今死矣德用曰中丞言官豈害我者朝廷亡一忠臣可惜也起為保靜軍節度觀察留後知青州改澶州陝西用兵久無功契丹遣劉六符來求復關南地以兵壓境德用見帝流涕言臣前被罪陛下赦而不誅今不足辱命帝慰勞曰河北方警籍卿鎮撫之又賜手詔慰勉拜保靜軍節度使歲大熟六符見德用拜曰此

公仁政所及也徙真定府定州路都總管還奏事復以  
宣徽南院使判成德軍未行徙定州路都總管日訓練  
士卒久之士殊可用契丹使諜者來覘或請捕殺之德  
用曰第舍之彼得實以告是服人之兵以不戰也明日  
大閱援桴鼓之士皆踴躍進退坐作終日不戮一人乃  
下令具糗糧聽吾鼓聲視吾旗幟所向覘者歸告契丹  
謂漢兵將大入既而復議和遂徙陳州又徙河南不行  
入奉朝請出判相州拜同中書門下平章事判澶州徙

鄭州封祁國公還為會靈觀使德用素善射雖老不衰侍射瑞聖園辭曰臣老矣不能勝弓矢帝再三諭之持二矢未發帝顧之使必中乃收弓矢謝一發中的再發又中帝笑曰德用欲中即中爾孰謂老且衰乎賜襲衣金帶加檢校太師復判鄭州徙澶州改集慶軍節度使封冀國公皇祐三年上疏乞骸骨以太子太師致仕大朝會綴中書門下班德用將家子習知軍中情偽善以恩撫下故多得士心雖屢臨邊境未嘗親矢石督攻戰

而名聞四夷間閭婦女小兒皆呼德用曰黑王相公帝嘗遣使問邊事德用曰咸平景德中賜諸將陣圖人皆死守戰法緩急不相救以至于屢敗誠願不以陣圖賜諸將使得應變出奇自立異効帝以為然德用雖致仕乾元節上壽預班廷中契丹使語譯者曰黑王相公乃復起耶帝聞之起為河陽三城節度使同中書門下平章事判鄭州至和元年遂以為樞密使命入謁拜明年富弼相契丹使耶律防至德用與防射玉津園防曰天

予以公典樞密而用富公為相將相皆得人矣帝聞之賜弓一矢五十後封魯國公求去位至六七乃以為忠武軍節度使景靈宮使又以為同羣牧制置使有詔五日一會朝聽子孫一人扶掖卒年七十九贈太尉中書令謚武恭加賜其家黃金德用諸子中咸融最鍾愛晚年頗縱之多不法後更折節自飭官至左藏庫使眉州防禦使

論曰全義德驤遇知太祖太宗超復翊戴真宗宜致崇

顯然革董無踰人者而各有子勤勲於國籍若知節生  
將家喜讀書立朝爭事以剛正稱天下其邦之司直歟  
有終起進士明幹知兵平蜀鉅賊振聲鄰敵可謂肇敏  
戎公矣至於精神折衝名聞四夷矯矯虎臣則德用其  
有焉

宋史卷二百七十八

欽定四庫全書

薈要卷五千九百七

史部

宋史卷二百七十九

元中書右丞相總裁托克托等修

列傳第三十八

王繼忠

傳潛張昭允附戴興

王漢忠 王能

張凝

魏能

陳興

許均

張進

李重貴

呼延贊

劉用

耿全斌

周仁美

王繼忠開封人父珫為武騎指揮使戍瓦橋關卒繼忠

年六歲補東西班殿侍真宗在藩邸得給事左右以謹厚被親信即位補內殿崇班累遷至殿前都虞候領雲州觀察使出為深州副都部署改鎮定高陽關三路鈐轄兼河北都轉運使遷高陽關副都部署俄徙定州咸平六年契丹數萬騎南侵至望都繼忠與大將王超及桑贊等領兵援之繼忠至康村與契丹戰自日昧至乙夜敵勢小却遲明復戰繼忠陣東偏為敵所乘斷餉道超贊皆畏縮退師竟不赴援繼忠獨與麾下躍馬馳赴

服飾稍異契丹識之圍數十重士皆重創殊死戰且戰  
且行旁西山而北至白城遂陷于契丹真宗聞之震悼  
初謂已死優詔贈大同軍節度賄轉加等官其四子景  
德初契丹請和令繼忠奏章乃知其尚在朝廷從之自  
是南北戢兵繼忠有力焉歲遣使至契丹必以襲衣金  
帶器幣茶藥賜之繼忠對使者亦必泣下嘗附表懇請  
召還上以誓書約各無所求不欲渝之賜詔諭意契丹  
主遇繼忠甚厚更其姓名為耶律顯忠又改名宗信封

楚王後不知其所終子懷節懷敏懷德懷政真宗官邸攀附者繼忠之次有王守俊至濟州刺史蔚昭敏至殿前都指揮使保靜軍節度翟明至洺州團練使王導度至磁州團練使楊保用至西上閭門使康州刺史鄭懷德至御前忠佐馬步軍都軍頭永州團練使張承易至禮賓使吳延昭至供備庫使白文肇至引進使昭州團練使彭睿至侍衛馬軍副都指揮使武昌軍節度靳忠至侍衛馬軍都虞候端州防禦使郝榮至安國軍節度

觀察留後陳玉至冀州刺史崔美至濟州團練使高漢  
美至鄭州團練使楊謙至御前忠佐馬步軍副都軍頭  
河州刺史

傅潛冀州衡水人少事州將張廷翰太宗在藩邸召置  
左右即位隸殿前左班三遷東西班指揮使征太原一  
日再中流矢又從征范陽先至涿州與契丹戰生擒五  
百餘人翌日上過其所見積尸及所遺器仗嘉歎之師  
旋擢為內殿直都虞候上對樞密言潛從行有勞賞薄

復加馬步都軍頭領羅州刺史改捧日右廂都指揮使  
領富州團練使遷日騎天武左右廂都指揮使領雲州  
防禦使雍熙二年命大將曹彬北征以潛為幽州道行  
營前軍馬步軍都指揮使師敗於拒馬河責授右領軍  
衛大將軍自檢校司徒降為右僕射仍削功臣爵邑明  
年起為內外馬步都軍頭領潘州防禦使尋拜殿前都  
虞候領容州觀察使端拱初加殿前副都指揮使領昭  
化軍節度出為高陽關都部署淳化二年四月拜侍衛

馬步軍都虞候領武成軍節度至道中出為延州路都  
部署改鎮州真宗即位領忠武軍節度數月召還咸平  
二年復出為鎮定高陽關三路行營都部署契丹大入  
緣邊城堡悉飛書告急潛麾下步騎凡八萬餘咸自置  
鐵錥鐵棰爭欲奮擊潛畏懦無方畧門門自守將校請  
戰者則醜言罵之無何契丹破狼山砦悉銳攻威虜略  
寧邊軍及祁趙游騎出邢洺鎮定路不通者踰月朝廷  
屢間道遣使督其出師會諸路兵合擊范廷召桑贊秦

翰亦屢促之皆不聽廷召等怒因詣潛曰公恇怯乃不如一嫗爾潛不能答都鈐轄張昭允又屢勸潛潛笑曰賊勢如此吾與之角適挫吾銳氣耳然不得已分騎八千步二千付廷召等於高陽關逆擊之仍許出兵為援洎廷召等與契丹血戰而潛不至康保裔遂戰死及車駕將親征又命石保吉上官正自大名領前軍赴鎮定與潛會潛卒逗遛不發致敵騎犯德棣渡河湊淄齊劫人民焚廬舍上駐大名而邊捷未至且諸將屢請益兵

潛不之與有戰勝者潛又抑而不聞上繇是大怒乃遣  
高瓊單騎即軍中代之令潛詣行在至則下御史府命  
錢若水同劾按一夕獄具百官議法當斬從駕羣臣多  
上封請誅之上貸其死下詔削奪潛在身官爵并其家  
屬長流房州潛子內殿崇班從範亦削籍隨父流所仍  
籍沒其貲產五年會赦徙汝州景德初起為本州團練  
副使改左千牛衛上將軍分司西京大中祥符四年車  
駕西巡至洛因命從駕還京遷左監門大將軍還其宅

久之判左金吾衛仗天禧元年卒

張昭允者字仲孚衛州人以父秉蔭試大理評事潘美妻以女奏換右班殿直以久次遷通事舍人端拱初契丹內擾命為雄州監軍敵騎乘秋掠境上昭允與知州田仁朗選銳卒襲其帳敗走之進西上閭門副使提總左右藏金銀錢帛昭允以諸州絹常度外長數尺請裂取付工官備他用歲獲羨餘既而士卒受冬服度之不及程出怨言昭允坐免官俄起為崇儀副使累遷西上

閣門使河西馬步軍鈐轄屯石州會討李繼遷王超出  
夏綏州路領後陣超深入數百里踰白池道阻糧絕昭  
允以所部援之戎人大敗真宗即位以昭允章懷皇后  
姊婿頗被親信咸平二年命為鎮定高陽關行營馬步  
都鈐轄時傅潛為都部署畏悞城守昭允屢勸其出兵  
潛按兵不動潛既得罪昭允亦削奪官爵長流道州景德  
二年起為楚州團練副使改右神武將軍大中祥符元年卒昭允喜筆札習射曉音律子正中居中

戴興開封雍丘人年十餘歲以勇力聞里中及長身長  
七尺餘美髭鬚眉目如畫太宗在藩邸興詣府求見竒  
之留帳下即位補御馬左直遷直長再遷御龍直副指  
揮使從征太原先登中流矢補御龍弓箭直指揮使遷  
都虞候一日帝問興曰汝頗有尊屬否對曰臣父延正  
兄進皆力田即召延正為諸衛將軍進為天武軍使俄  
以興領嚴州刺史改天武左廂都指揮使領勝州團練  
使雍熙三年曹彬等北征失律諸將多坐黜免以興為

侍衛步軍都虞候領雲州防禦使契丹撓邊命興屯澶  
州以備非常改本州觀察使充天雄軍副都部署端拱  
初遷步軍都指揮使領鎮武軍節度賜襲衣金帶鞍勒  
馬歷澶州天雄軍都部署改殿前副都指揮使出帥鎮  
定二州時盜賊羣起會五巡檢兵討之踰月不能克興  
陰勒所部潛出擊之擒戮殆盡未幾徙高陽關遷殿前  
都指揮使領定國軍節度賜白金萬兩歲加給錢七百  
萬淳化五年出為定武軍節度歲加給錢千萬西北未

平徙夏州路行營都部署知州事時五路討李繼遷興  
所部深入千餘里不見賊會太宗崩三上表求赴國哀  
不俟報上道及至京師以擅離所部左遷左領衛上將  
軍咸平初兼判左金吾衛仗俄出知京兆府卒贈太尉  
遣中使護其喪歸葬鄉里錄其子永和永豐

王漢忠字希傑徐州彭城人少豪蕩有膂力形質魁岸  
善騎射節帥高繼沖欲召至帳下漢忠不往因毆殺里  
中少年遂亡經宿復蘇其父遣人追及於蕭縣漢忠不

肯還西至京師太宗在藩邸召見奇其材力置左右即位補殿前指揮使累遷內殿直都知從征太原先登流矢中眸戰益急上壯之遷東西班指揮使劉繼元降以所部安撫城中師還改殿前左班指揮使三遷右班都虞候領涿州刺史雍熙中改馬步軍都軍頭端拱初出為賓州團練使歷冀貝二州部署徙天雄軍二年入為侍衛馬軍都虞候領洮州觀察使高陽關副都部署契丹南侵漢忠合諸軍擊敗之斬馘甚衆淳化初徙定州

五年遷殿前都虞候真宗即位自中山召歸俄復出為高陽關都部署進領威塞軍節度咸平三年又為涇原環慶兩路都部署兼安撫使遷侍衛馬軍都指揮使改鎮定高陽關都部署三路都排陣使契丹掠中山漢忠率諸將陣于野契丹遁追斬甚衆獲其貴將加殿前副都指揮使改領保靜軍節度五年罷西面經略使命漢忠為邠寧環慶兩路都部署李允正宋沆為鈐轄領戍兵二萬五千人委漢忠分道控制數月召還坐違詔無

功責為左屯衛上將軍出知襄州常奉外增歲給錢二百萬未上道暴得疾卒贈太尉以其長子內殿崇班從吉為階門祇候次子從政從益為左右侍禁漢忠有識略軍政甚肅每行師詰旦必行香祝曰願軍民無犯吾令違者一毫不貸故所部無盜性剛果不務小節輕財樂施好讀書頗能詩喜儒士待賓佐有禮名稱甚茂以是自矜尚羣帥不悅漢忠沒後其子從吉詣闕上書訟父冤因歷詆羣臣有行賂樹黨及蒙蔽邊防屯戍艱苦

之事真宗命樞密王繼英等問狀從吉止誦狀中語他無所對上以從吉付御史具伏乃進士楊逢為之辭從吉坐除名配隨州逢杖配春州

王能廣濟定陶人初事州將袁彥太宗在晉邸召置左右即位補內殿直六遷至殿前左班指揮使進散員都虞候久之領潘州刺史再遷殿前右班都虞候兼御前忠佐馬步軍都軍頭咸平初自捧日右廂都指揮使出為濟州團練使知靜戎軍建議決鮑河斷長城口北注

雄州塘水為戎馬限方舟通漕以實塞下又開方田盡  
靜戎順安之境北邊來寇能擊走之初真宗詢軍校勤  
勇者委以方面因語宰相曰聞王能魏能頗宣力公家  
陳興張禹班亦有聲于時才固難全拔十得五亦有助  
也景德初擢本州防禦使與魏能張凝並命出為邢洺  
路都部署俄改鎮定高陽關三路行營都部署押策先  
鋒護城祁州躬率丁夫旦暮不離役所宴犒周洽會詔  
使自北至者言之手詔褒飭連徙天雄軍高陽關二部

署改定州副都部署大中祥符二年詔合鎮定兩路部  
署為一命能領之明年召入拜侍衛步軍副都指揮使  
領曹州觀察使祀汾陰留為京城巡檢兼留司殿前司  
事禮成加領振武軍節度復為鎮定副都部署兼知定  
州八年表求入觀許之先是節帥陞見必飲於長春殿  
掌兵者則不預至是特令用藩臣例有司言能既赴坐  
則殿前馬軍帥皆當侍立繇是特令諸帥預坐自是掌  
兵者率以為例俄還屯所改領靜江軍節度天禧元年

轉都指揮使領保靜軍節度是冬代還入見以足疾免  
舞蹈賜宴累表求解特與告醫療二年制授彰信軍節  
度罷軍職赴鎮以地近其鄉里寵之也明年卒年七十  
八贈太尉而錄其子守信等官

張凝滄州無棣人少有武勇倜儻自任鄉人趙氏予以  
材稱凝耻居其下因挾弓與角勝負約築土百步射之  
凝一發洞過矢激十許步抵大樹而止觀者歎服節帥  
張美壯之召置帳下太宗在藩邸聞其名以隸親衛即

位補殿前指揮使稍遷散祇候班都虞候淳化初以其  
有材幹與王斌王憲並授洛苑使凝領繡州刺史賜襲  
衣金帶每頒賚必異等出為天雄軍駐泊都監移貝州  
改高陽關行營鈐轄六宅使真宗踐祚加莊宅使遷北  
作坊使咸平初契丹南侵凝率所部兵設伏於瀛州西  
出其不意腹背奮擊挺身陷敵凝子昭遠年十六從行  
即單騎疾呼突入陣中掖凝出左右披靡不敢動明年  
契丹兵大至車駕幸大名凝與范廷召於莫州東分據

要害斷其歸路契丹宵遁凝縱兵擊之盡奪所掠生口  
資畜徙鎮定高陽關路前陣鈐轄遷趙州刺史四年召  
還代潘璘為邠寧環慶靈州路副部署兼安撫使時斤  
堠數擾轉運使劉綜懼飛輓不給問計於凝凝曰今當  
深入因敵資糧不足慮也乃自白豹鎮率兵入敵境生  
擒賊將燒蕩三日餘帳芻糧八萬斬首五千餘獲牛馬  
器甲二萬降九百餘人慶州蕃族胡家門等桀黠難制  
疑因襲破之又熟戶與生羌錯居頗為誘脅凝引兵至

八州原分水嶺柔遠鎮降答都等百七十餘族合四千戶邊境獲安就加寧州團練使景德初遷本州防禦使代楊嗣為定州路行營副部署徙保州駐泊又兼北面安撫使時王超為總帥以大兵頓中山朝議擇凝與魏能田敏楊延昭分握精騎俟契丹至則深入以牽其勢超嘗請四人悉隸所部上以本設竒兵撓敵之心腹若復取裁大將則無以責效乃令凝等不受超節度時魏能逗撓退保城堡衆皆憤悱責讓能凝獨默然或問之

凝曰能麤材險復既不為諸君所容吾復切言之使其  
心不自安非計也上聞而嘉其有識車駕觀兵澶淵凝  
率衆抵易州既而契丹受盟北歸所過猶侵剽不已遂  
以凝為緣邊安撫使提兵躡其後契丹乃不敢略奪改  
高陽關部署明年議勞就加殿前都虞候卒凝忠勇好  
功名累任西北善訓士卒繕完器仗前後賞賜多以犒  
師家無餘資京師無居第真宗悼惜之贈彰德軍節度  
遣中使護喪還京官給葬事厚卹其家子昭遠

魏能鄆人也少應募隸雲騎軍後選補日騎左射又隸殿前班七遷散員左班都知舊制諸軍辭見才器勇敢或迥異出羣者許將校交舉以任使毋枉其志能時戍外藩咸平未有舉者太宗曰能材勇過人朕可自保由是進用之端拱二年加御前忠佐馬軍副都軍頭歷殿前左班都虞候領溪州刺史加秩轉馬步軍都軍頭咸平三年真拜黃州刺史明年為鎮定高陽關三路前陣鈐轄五年知鄭州團練使復任威虜軍契丹入寇能當

城西與諸將合戰無憚色大敗其衆斬首二萬級契丹  
統軍鐵林公來薄陣能發矢殪之并其將十五人奪甲  
馬兵械益衆契丹復入能率州軍逆戰南關門遣其子  
政與都監劉知訓間道絕敵行勢戰數十合退薄西山  
下破走之獲器甲十八萬契丹嘗謀入鈔能偵知即發  
兵逆擊生擒酋帥殄滅殆盡六年改威虜軍部署知軍  
事士民詣闕下乞留能詔嘉之能建言戍卒逸邊境者  
請沒其妻與子為奴婢上慮嚴迫聽緩期自新違以法

坐會浚順安軍營田河道以扼寇從莫州路部署石普  
屯兵順安之西境詔能與楊延昭田敏掎角為備景德  
初破敵長城口追越陽山斬首級獲兵器益衆詔賜錦  
袍金帶復以所部禦寇于順安六月召拜防禦使復出  
為寧邊軍路部署詔推能果略再任以威虜使副精兵  
伺敵動止邊人百餘掠居民樹蕃僧為帥能與田敏楊  
勲合兵設伏擊之擒其帥賊來逼城能出兵拒之少効  
即郤陣入城張凝以兵擊郤之會詔能與凝領偏師分

道入幽易牽制契丹之勢能畏懼不前且不戢所部多  
俘奪人馬俄徙屯定州及遣凝蹕迹北行能麤險自度  
無功心愧多怨辭以訕聞朝議謂能剛猾少檢不可專  
任乃命綦政敏為鈐轄俾同職焉明年師還大名時王  
能曹璨各領兵歸闕即城下鈐轄孫全照遣能璨之師  
由北門分道先入能師繼之能怒全照之後已即疾驅  
競入全照射之能嚄唶不堪奪全照弓以去翌日詣判  
府王欽若誣全照射傷押隊閣門楊凝詞頗紛競全照

密疏能摧兵退縮師緩失期及師旋不整狀上初聞能  
逗遛微怒會全照奏乃質實于張凝白守素等即責授  
右羽林將軍出為鞏縣都監明年以自陳特改官右驍  
衛大將軍虢州都監累遷加領康州團練使大中祥符  
八年卒錄其子正為閣門祗候靖為三班奉職

陳興澶州衛南人開寶中應募為卒得隸御龍右直太  
宗征河東幸幽陵興常從特被賞賜累遷天武指揮使  
端拱中改御前忠佐步軍副都軍頭王超為并代部署

奏興隨軍遣戍汾州明年李繼隆行營河西興隸麾下  
部清朔龍衛諸軍克綏夏銀州繼隆命權知夏州尋還  
屯所受詔提轄河東緣邊城池器甲芻糧至道初繼隆  
薦其材幹召補御龍弩直都虞候咸平初為馬軍都軍  
頭領蒙州刺史三年真授憲州刺史知霸州從滄州副  
都部署移石隰駐泊會城綏州詔與錢若水往視利害  
事具若水傳又徙涇原儀渭鎮戎軍部署上言鎮戎軍  
去渭州瓦亭砦七十餘里中有二堡請留兵三百人戍

之俄與曹瑋秦翰領兵抵鎮戎軍西北武延鹹泊川掩擊蕃寇章埋族帳斬二百餘級生擒三百餘人奪鎧甲牛羊駝馬三萬計詔書嘉獎賜金帶錦袍器幣繼遷所部康奴族往歲鈔劫靈州援糧恃險與衆尤桀黠難制復與秦翰等合衆進討窮其巢穴俘老幼獲器畜甚衆盡焚掘其窖藏復詔褒之仍加賜賚其年六合大首領潘羅支言欲率諸蕃擊賊請會兵靈州上以道遠難制師期詔興候羅支報至即勒所部過天都山以援勿須

奏命會繼遷死事寢景德三年遷本州團練使知徐州  
興起行伍有武略所至頗著聲績真宗言軍校之材必  
以興為能大中祥符初召為龍神衛四廂都指揮使領  
登州防禦使出為邠寧環慶路副都部署兼知邠州坐  
擅釋劫盜罷軍職改徐州防禦使知懷州六年卒

許均開封人父邈太常博士均建隆中應募為龍捷卒  
征遼州以功補武騎十將賜錦袍銀帶開寶中遷武騎  
副兵馬使從曹彬征金陵率衆陷水砦流矢貫手改本

軍使從征河東攻隆州城先登陷之中八創遷副指揮使前後屢被賞賚出屯杭州妖僧紹倫結黨為亂均從巡檢使周瑩悉擒殺之端拱初補指揮使從李繼隆秦翰赴夏州擒趙保忠令均率兵衛守改龍衛第四指揮使俄屯夏州賊來犯境一日十二戰走之又從石普擊賊于原州牛欄砦深入獲牛羊漢生口甚衆普表上其功遷第三軍指揮使咸平初以御前忠佐馬軍都軍頭戍秦州王均之亂遣乘傳之蜀隸雷有終麾下守魚橋

門又從秦翰追殺賊黨於廣都降其衆七千餘騎召授  
東西班都虞候領順州刺史五年稍遷散員都虞候嘗  
召見訪以北面邊事翌日真拜磁州刺史深州兵馬鈐  
轄六年改涇州駐泊部署數月知鎮戎軍嘗出巡警至  
隴山木峽口真宗以其無故離城慮有狂寇奔突詔書  
戒敕俄以其不明吏治用曹瑋代之徙為邠州駐泊部  
署改永興軍部署車駕將巡澶淵詔均與知府向敏中  
及鳳翔梁鼎同提總諸州巡檢捕盜事至河陽召赴行

在時有王長壽者本亡命卒有勇力多計慮聚徒百餘是春抵陳留剽劫縣民捕之不獲朝廷遣使益兵逐之澶濮間會契丹南侵夾河民庶警擾長壽結黨愈衆人皆患之均至胙城長壽與其徒五千餘人入縣鈔掠均部下徒兵楊袒與鬪均以方略誘之生擒長壽斬獲惡黨皆盡上以方禦敵未欲因捕賊獎均但賞均部下卒被傷者賜帛遷級焉明年追敍前勞擢為本州團練使尋出知代州四年秋均被疾以米銳代還未至而均卒

錄其子懷忠為奉禮郎懷信為侍禁幼子懷德自有傳  
張進兗州曲阜人拳勇善射挽彊及石餘應募曹州隸  
鎮兵太祖親選勇士奇進才力以補控鶴官積勞至御  
龍弩直都虞候領恩州刺史至道中兼御前忠佐步軍  
都軍頭太宗嘗幸內廄進以親校執鉞前導體質魁岸  
迥出儕輩太宗熟視異之擢為天武右廂都指揮使領  
賀州團練使咸平初遷昭州防禦使充龍神衛四廂都  
指揮使京城左右廂巡檢未幾遷捧日天武四廂都指

揮使二年秋閱武近郊進與殿前都指揮使王超親執  
金鼓節其進退軍容甚肅從上北征又與超管勾大陣  
及先鋒策應三年權殿前都虞候遷侍衛步軍都虞候  
鎮州副部署徙天雄軍部署會河決鄆州王陵口發數  
州丁男塞之命進董其役凡月餘畢詔褒之移并代副  
都部署李繼遷寇麟州州將遣單介間道乞師太原諸  
將以無詔旨猶豫未決進獨抗議發兵赴援既至而圍  
解手詔褒美契丹侵中山命進率廣銳二萬騎由土門

會兵鎮定未至而敵退復歸晉陽景德元年卒上遣中使護喪還京官給葬事子元晉至內殿崇班閤門祇候天禧末錄其次子元素為三班借職

李重貴孟州河陽人姿狀雄偉善騎射少事壽帥王審琦頗見親信以甥妻之補合流鎮將鎮有羣盜以其尚少謀夜入劫鈔重貴知之即築柵課民習射盜聞之潰去太宗在藩邸知其勇幹召隸帳下即位補殿前指揮使累遷至龍衛左第四軍都指揮使領河州刺史改捧

日右廂都指揮使領蠻州團練使至道二年出為衛州團練使未行會命將五路討李繼遷以重貴為麟府州濁輪砦路都部署得對便殿因言賊居沙磧中逐水草牧畜無定居便戰鬪利則進不利則走今五路齊入彼聞兵勢太盛不來接戰且謀遠遁欲追則人馬乏食將守則地無堅壘賊既未平臣輩何顏以見陛下太宗善之出御劒以賜又累遣使撫勞既而諸將果無大功及還命為代并副都部署真宗即位加本州防禦使徙高

陽關行營副都部署咸平二年契丹南侵議屯兵楊疃  
張凝領先鋒遇敵重貴率策應兵酣戰全軍而還范廷  
召自定州至遇契丹兵交戰康保裔大陣為敵所覆重  
貴與凝赴援腹背受敵自申至寅疾力戰敵乃退時諸  
將頗失部分獨重貴與凝全軍還屯凝議上將士功狀  
重貴喟然曰太將陷沒而吾曹計功何面目也上聞而  
嘉之明年春以勞進階及食邑徙知貝州召至勞問復  
遣入郡是冬徙滄州駐泊副都部署兼知州事以疾求

還京就醫藥既愈連為邢州天雄軍二部署又知冀州  
景德初車駕幸澶淵召還為大內都部署明年春出知  
鄭州以疾甚授左武衛大將軍領潘州防禦使改左羽  
林軍大將軍致仕大中祥符三年卒

呼延贊并州太原人父琮周淄州馬部都指揮使贊少  
為驍騎卒太祖以其材勇補東班長入承旨遷驍雄軍  
使從王全斌討西川身當前鋒中數創以功補副指揮  
使太平興國初太宗親選軍校以贊為鐵騎軍指揮使

從征太原先登乘城及堞而墜者數四面賜金帛獎之  
七年從崔翰戍定州翰言其勇擢為馬軍副都軍頭稍  
遷內員寮直都虞候雍熙四年加馬步軍副都軍頭嘗  
獻陣圖兵要及樹營砦之策求領邊任名見令之作武  
藝贊具裝執鞬馳騎揮鐵鞭棗槊旋繞廷中數四又引  
其四子必興必改必求必顯以入迭舞劒盤槊賜白金  
數百兩及四子衣帶端拱二年領富州刺史冀州副都部署  
並加都軍頭淳化三年出為保州刺史俄與輔超

至屯所以無統御材改遼州刺史又以不能治民復為都軍頭領扶州刺史加康州團練使咸平二年從幸大名為行宮內外都巡檢真宗嘗補軍校皆叙已功或至謹謹贊獨進曰臣月奉百千所用不及半忝幸多矣自念無以報國不敢更求遷擢將恐福過災生再拜而退衆嘉其知分三年元德皇太后園陵命掌護儀衛及還而卒贊有膽勇鷙悍輕率常言願死於敵偏文其體為赤心殺賊字至於妻孥僕使皆然諸子耳後別刺字曰

出門忘家為國臨陣忘死為主及作破陣刀降魔杵鐵  
折上巾兩旁有刃皆重十數斤絳帕首乘駒馬服飾詭  
異性復鄙誕不近理盛冬以水沃孩幼冀其長能寒而  
勁健其子嘗病贊刲股為羹療之贊卒後擢必顯為軍  
副都軍頭

劉用相州人祖萬進河中府馬步軍都指揮使父守忠  
左驍衛大將軍致仕用曉音律善騎射事太宗于晉邸  
即位補軍職累遷散都頭都虞候端拱初為馬步軍副

都軍頭領涼州刺史鎮定招安使轉捧日都指揮使李順亂蜀為西路行營鈐轄斬首千餘級奪馬五百疋改高陽關副都部署真宗即位加本州團練使并州副都部署咸平中徙貝州俄知瀛州復為高陽關副都部署時烽堠數警用建議益邊兵俟其南牧即率驍銳出東路以牽制其勢因圖上地形上召宰相閱視可其奏且令轉運使於保州威虜靜戎順安軍預備資糧六年命將三

路出師扞敵詔用與劉漢凝田思明領兵五千由東路  
會石普孫全照掎角攻之未幾換鎮州副部署景德初  
為邢州部署車駕北征用以城守之勞進爵邑歷知齊  
陳潞三州大中祥符二年卒

耿全斌冀州信都人父顥懷順軍校全斌少豐偉顥攜  
謁陳搏搏謂有藩侯相顥戍西蜀全斌往省乘舟泝江  
夜大風失纜漂七十里至曙風未止舟忽泊岸人頗異  
之後游京師屬太宗在藩邸全斌候拜于中衢自薦材

幹得名試武藝以善左射隸帳下即位補東班承旨稍遷驍猛副兵馬使從征太原還遇契丹于蒲陰追擊至徐河因據水口要害遷補日騎副兵馬使雲騎軍使屯瀛州與契丹戰所乘馬兩中流矢死凡三易乘戰不却契丹為引去端拱初擊蕃部于宥州敗之歷雲騎指揮使御前忠佐馬軍副都軍頭改馬軍都軍頭戍深州累轉散直都虞候領順州刺史改殿前左班都虞候馬步軍都軍頭全斌在軍中有能名真宗嘗召問邊事全斌

口陳利害甚稱旨因謂輔臣曰元澄鄭誠耿全斌人多  
稱之觀其詞氣若有志操止在宿衛無以見其才宜以  
邊郡試之遂拜雄州刺史知深州徙石隰部署以備河  
西繼遷死全斌率兵入伏落關誘蕃部來歸者數千人  
俄知安肅軍嘗繪山川險易為圖以獻契丹來侵自山  
北抵河滻全斌遣子從政焚橋砦分率精兵擊走之改  
冀州刺史高陽關鈐轄擢從政為侍禁寄班祇候大中  
祥符初封禪泰山以為濮州鈐轄其年還京師卒

周仁美深州人開寶中應募隸貝州驍捷軍闖南李漢超選備給使屢捕獲契丹謀者從漢超戰于西嘉山身中重創補隊長漢超上其功隸殿前班賜衣帶鞍勒馬什物奴婢器械命王繼恩引入縱觀過祇候庫太祖問其力能負錢幾許仁美曰臣可勝七八萬太祖曰可惜壓死止命負四萬五千因賜之稍遷右班都知御前忠佐馬軍副都軍頭戍環州時牛耶泥族累歲為寇仁美與陳德元宋思恭往擊之斬首三千級獲牛羊三百餘

發戎族困窘以餉師又與思恭討募窟泉岌施族格鬪  
斬八十餘級至道初石昌牛耶泥族復叛德玄令仁美  
提兵撫輯之仁美謂石昌鎮主和文顯曰此賊不除邊  
患未弭因厚設殼酒召酋長二十八人縛送州獄自是  
諸族憚畏二年又與馬紹忠白守榮田紹斌部芻糧趣  
清遠軍仁美為先鋒至岐子平與虜角走之明日又戰  
于浦洛河自己至戍戰數十合進壁乾河紹忠守榮皆  
敗走紹斌退止浦洛獨仁美所部不滿三千身中八創

護芻糧官吏直抵清遠紹斌繼至深歎其勇幹表上其功時運糧民道路被傷者相繼仁美領徒援護悉抵環州又遇虜於橐駝路擊走之先是諸蕃每貢馬京師為繼遷邀擊仁美領騎士為援賊不敢犯補瀘州龍衛軍都虞候部署李繼隆奏留麾下選軍中伉健者千人令仁美領之屢入敵境戰有功俄還瀘州召見會令諸軍射仁美自陳筋力未衰願對殿廷發二矢上許之既而前奏曰臣老於戎門多戍外郡罕曾入觀京闕前後征

行體被三十餘創今日得對萬乘千載之幸儻或備員  
宿衛立殿庭下一日足矣上顧傅潛而笑潛亦稱其武  
幹力留補馬步軍副都軍頭潛屯北面常以自隨契丹  
攻蒲陰仁美領萬騎解其圍又從王超屯鎮定儀渭累  
遷龍衛軍都指揮使領順州刺史復屯鎮定時州有亡  
命卒聚盜剽村閭為患王超委仁美招捕仁美選勇敢  
卒詐亡命趣賊所得其要領即自往諭以禍福留賊中  
一日超忽失仁美求之甚急詰旦仁美至具道其事乃

出庫錢付仁美為賞不數日賊悉降凡得二百餘人以  
隸軍籍景德中徙屯陳州入掌軍頭引見司大中祥符  
元年從駕泰山命檢視山下諸壇牲牢祭饌明年出為  
磁州團練使知衛州俄改滄州部署移高陽關副部署  
八年擢為龍神衛四廂都指揮領冀州防禦使遷捧日  
天武四廂都指揮使改領端州防禦使權京新城內都  
巡檢先是巡兵捕亡卒盜賊不獲皆有罰而獲者無賞  
仁美因差立賞格以聞詔從其請天禧三年卒

論曰繼忠臨陣赴敵以死自效其生也亦幸而免然在  
朔庭貴寵用事議者方之李陵而大節固已虧矣潛為  
三路帥握兵八萬餘大敵在前逗撓畏縮致康保裔以  
無援戰沒此而不誅宋於是乎失刑矣興均輩或由藩  
邸進或自行伍起一時際會出則書勲轅門入則拱扈  
巖陛求其如古名將則未之見也

宋史卷二百七十九

宋史卷二百七十九考證

王繼忠傳後不知其所終○

臣宗楷

按遼史繼忠封鄖

琊郡王進楚王賜國姓拜樞密使太平三年致仕卒

宋史卷二百七十九考證

謹案卷二百七十八第八頁前二行配德均州按

孝先傳作配均州此德字疑衍



總校官庶吉士臣張能照  
校對官庶吉士臣陳墉

贊錄監生臣張健

欽定四庫全書叢要

史部

宋史卷二百八十一



詳校官編修臣王天祿

欽定四庫全書

欽定四庫全書會要卷五千九百八

史部

宋史卷二百八十

元中書右丞相總裁托克托等修

列傳第三十九

田紹斌

王榮

楊瓊

錢守俊

徐興

王果

李重誨

白守素

張思鈞

李琪

王延範

田紹斌汾州人仕河東劉鈞為佐聖軍使戍遼州周顯



德四年領五十騎來歸鈞屠其父母家屬世宗召補驍武副指揮使宋初隨崔彥進征李筠攻大會砦破之以功遷龍捷指揮使又敗筠於澤州茶礮村筠退保澤州紹斌鑿濠圍守流矢中左目前軍部署韓令坤以其事聞及太祖召見于潞州紹斌殺晉軍益衆奪其鎧甲又從討李重進于揚州壁城南圍三日城潰斬首踰千級賜袍帶緒帛尋補馬軍副都軍頭龍衛指揮使下荆湖平嶺南率皆從行討蜀隸大將劉延讓麾下會全師雄

寇神泉紹斌率所部敗其黨數千時漢劖道梗因賴以  
寧太祖遣使孫晏齋詔賜賚有加凡在蜀三歲剽盜殄  
除還改龍捷都虞候嘗盜官馬貿直盡償博進事發獄  
具有司引見講武殿紹斌稱死罪太祖知其驍勇欲宥  
之執於門外遣內侍私謂之曰爾今死有餘責紹斌曰  
若恩貸臣死當盡節以報俄復引見釋之且密賜白金  
會征江南擇諸軍借事得五百人為步鬪軍令紹斌領  
之及率雲騎二千抵昇州城下克獲居多太祖親討河

東命紹斌從何繼筠扼契丹兵于北百井奪賊鼓幟而還太平興國初擢龍衛軍指揮使領江州刺史二年梅山洞蠻叛命與翟守素分往擊之至邵州聞蠻首符漢陽死去其居十里大潰其衆擒蠻二萬令軍中取利劍二百斬之餘五千遣歸諭諸洞自是其黨帖服太宗賜以金帛綺錢金帶鞍馬歷天武日騎軍指揮使改馬步都軍頭出戍鎮定高陽關曹彬之攻幽州也命為先鋒指揮使遇契丹兵鬪奪牛羊器甲師還召見便殿加領

溪州團練使復遣屯北面端拱元年拜冀州防禦使尋改解州淳化中為河中同丹坊鄜延橫嶺蕃界都巡檢使會鄭文寶議城席雞城砦為清遠軍紹斌與文寶領其役城畢以文寶之請命為知軍事至道元年拜會州觀察使仍判解州俄充靈州馬步軍部署領徒入蕃討賊斬首二千級獲羊馬橐駝二萬計馬以給諸軍之闕者捷聞手詔嘉諭之數部金粟帛詣靈武清遠遠人驚服不擾未幾皇甫繼明白守榮等督轉餉於靈州紹斌

率兵援接抵鹹井賊踰三千餘來薄陣且行且鬪至耀  
德凡殺千人寇復尾後紹斌為方陣使被傷者居中自  
將騎三百步弩三百與敵兵確于浦洛河大敗之初守  
榮與紹斌為期既而繼明卒故後一日遂為賊所圍守  
榮等欲擊之紹斌曰蕃戎輕佻勿棄輜重與戰當按轡  
結陣徐行守榮等忿曰若但率兵來迎勿預吾事紹斌  
因率所部去輜重四五里繼遷初見紹斌旌旗不敢擊  
守榮等自欲邀功與戰賊先伏兵以羸騎挑戰已而伏

發守榮等戰敗丁夫慞貽遁踐踐至死者衆紹斌率所部徐還一無遺失至清遠與張延州會食見濠中人裸而呼曰我白守榮也繩引而上解衣遺之遣內侍馬從順驛聞太宗益嘉之優詔褒美時命李繼隆范廷召討繼遷就命紹斌為本州都部署兼內外都巡檢使繼隆以浦洛之敗上聞言紹斌握兵不顧自言靈武非我不能守欲圖方面有異志太宗怒曰此昔嘗背太原來投今又首鼠兩端真賊臣也即遣使捕繫詔獄鞫問貶右

監門衛率府副率虢州安置真宗即位召還授右監門  
衛大將軍領叙州刺史尋改萊州防禦使詔還其所籍  
居第賜良馬十匹調環慶靈州清遠軍部署慶州有野  
雞族數為寇掠道路患之嘗有驍捷卒二十餘往邠州  
為其掠奪即馳告紹斌紹斌召其首帥三人斷臂馘劓  
放還寇感而化帖服紹斌素勇悍與同職頗不叶轉運  
使宋太初每按部靈州清遠多貿市紹斌語發其私太  
初心銜之及還朝言紹斌之過尋赴召直其事咸平二

年北面寇警復命為鎮定高陽關路押先鋒隸傅潛潛遣與石普並戍保州普陰與知州楊嗣議出兵擊討之及夜普嗣未還紹斌疑其敗衄卽領兵援之普嗣果為賊所困度嚴涼河頗喪師衆及紹斌至即合兵疾戰獲一百四十餘人以勞遷邢州觀察使潛屯中山紹斌三馳書於潛且言邊衆大至但列兵唐河南背城與戰慎無窮追潛性巽懦聞之益不敢出賊衆益熾焚劫城砦車駕駐大名召潛屬吏詞逮紹斌卽遣使械繫下御史

臺鞫問免官黜為左衛率府副率送往上都禁其出入  
五年授右千牛衛將軍致仕景德初起為左龍武軍將  
軍永城兵馬都監三年遷左監門衛大將軍帝以紹斌  
久失職不宜在衝要乃徙考城都監大中祥符初領長  
州刺史從東封朝覲壇就班軍士建充庭旗旗倒壓紹  
斌仆地遽起無傷時紹斌已老其壯健若此遷左領軍  
衛大將軍領康州團練使鞏縣都監二年卒年七十七  
紹斌長兵間習戰法其後累以格鬪立功然性暴戾故

屢被黜子守信為內殿崇班閣門祇候

王榮定州人父洪嗣仕晉為本州十縣遊奕使榮少有  
膂力事瀛州馬仁瑀為廝役太宗在藩邸得隸左右即  
位補殿前指揮使稍遷本班都知員僚直都虞候盜發  
棣州州兵不能捕榮往討擒之加御前忠佐馬步軍都  
軍頭領懿州刺史坐受秦王廷美宴勞出為濮州馬軍  
教練使未行馬仁瑀子告榮與秦王親吏善因狂言我  
不久當得節帥坐削籍流海島雍熙中召還為副軍頭

端拱初改員僚左右直都虞候兼都軍頭復領懿州刺史累遷龍衛都指揮使領羅州團練使率兵戍遂城邊騎來寇擊敗之擒千餘人召拜侍衛馬軍都虞候峰州觀察使出為定州行營都部署榮廳率所為不中理侵取官地蒔蔬吝惜公錢不以勞將士且母老不迎養供給甚薄太宗聞而怒曰忠臣出於孝子之門榮事親若此竄逐之餘兇行弗悛豈可復置左右效晉帝養成張彥澤邪即詔罷督責授右驍衛大將軍寄班供奉官張

明護定州兵覩榮不法間嘗規正榮護短每疾其攻已  
莊宅使王斌亦監軍是州素與榮善意明捕榮之罪因  
摭明以報怨下樞密院問狀皆不實上怒語左右曰張  
明起微賤中以蹴鞠事朕潔已小心見於輩流夫刑罰  
之加必當其罪今王斌以榮故而曲奏明罪欲致刑憲  
苟失其當適足以快榮之心而誣罔得以肆行矣且榮  
凌轢同類事君與親鮮竭其力國家賞罰之柄非所敢  
私將帥之職非裨校同朕豈黨張明而棄王榮哉柰何

不求直於理之當也遂賜勞明緺錢束帛榮遷右羽林軍大將軍真宗即位領獎州刺史尋授濱州防禦使遷涇原儀渭駐泊部署咸平二年車駕北征召為貝冀行營副都部署師旋復還涇原明年援送靈武芻糧疎於智略不嚴斥候至積石夜為蕃寇所刦營部大亂衆亡殆盡法當誅恕死除名配均州六年起為左衛將軍景德初權判左金吾街仗司事上觀兵澶淵契丹游騎涉河水抵濮州境命為黃河南岸都巡檢使與鄭懷德自

行在領龍衛兵追襲時已詔滄州部署荆嗣先率所部  
屯淄青遣榮等合兵邀擊之二年遷左神武軍大將軍  
領恩州刺史郊祀改左龍武軍領達州團練使大中祥  
符中遷左衛大將軍領昌州防禦使六年朝太清宮命  
為河南府駐泊都監九年卒年七十官其一子榮善射  
嘗引強注屋棟矢入木數寸時人目為王硬弓

楊瓊汾州西河人幼事馮繼業以材勇稱太宗召置帳  
下即位隸御龍直三遷神勇指揮使從征太原以勞補

御龍直指揮使雍熙初改弩直都虞侯兼御前忠佐馬步都軍頭領顯州刺史淳化中李順叛蜀環往夔峽擒賊招安領兵自峽上與賊遇累戰抵渝合與尹元裴莊分路進討克資普二州雲安軍斬首數千級詔書嘉獎遣使即軍中真拜單州刺史至道初召還共職明年徙知霸州兼鈐轄未幾改防禦使靈慶路副都部署河外都巡檢使賊累寇疆境固捍有功導黃河溉民田數千頃敗賊於合河鎮北擒獲人畜居多賊騎五百掠城下

擊破之追北三十里並賜詔嘉諭咸平二年命為涇原  
儀渭邠寧環慶清遠軍靈州路副都部署尋徙鎮定高  
陽關三路押策先鋒屯定州之北明年副王超為鎮州  
都部署再遷環慶徙定州四年召還以鄜州觀察使充  
靈環十州軍副都部署兼安撫副使嘗遣使諭旨賊若  
寇清遠及青岡白馬砦即合兵與戰是秋果長圍清遠  
賴積石河清遠屢走間使詣瓊請濟師瓊將悉出兵為  
援鈐轄內園使馮守規都監崇儀使張繼能曰敵近重

兵在前繼無以進不可悉往乃止命副部署海州團練  
使藩璘都監西京左藏庫劉文質率兵六千赴之且曰  
伺我之繼至瓊逗遛不進頓慶州寇鼓兵攻南門其子  
阿移攻北門堙壕斷橋以戰瓊遣鈴轄李讓督精卒六  
百往援至則城陷矣賊泊青岡城下瓊與守規繼能方  
緩行出師及聞清遠之敗益恇怯不前順州刺史王瓊  
普謂瓊曰青岡地遠水泉非屯師計願棄之瓊合謀焚  
芻糧兵仗驅老幼以出瓊却師退保洪德砦寇威浸熾

未嘗交一鋒事聞于上傳召瓊輦悉繫御史獄治罪當  
死兵部尚書張齊賢等議請如律詔特貸命削官長流  
崖州繼能守規輩同坐籍其家業明年移道州景德初  
起為右領軍衛將軍分司西京累遷左領軍衛大將軍  
領賀州團練使知兗州有州卒自言得神術能飛行空  
中州人頗惑瓊捕至折其足奏戮之五年卒年六十七  
錄其子舜臣為奉職長子舜賓內殿崇班閣門祇候  
錢守俊濮州雷澤人少勇鷙嘗為盜陂澤中稱轉陂鶻

周顯德中應募為鐵騎卒早事太祖從征淮南戰紫金山下壽春獲戰艦千餘艘繼從克闕南宋初補禁衛隸散員直乾德中轉殿前班都知尋征太原方戰矢中左足拔而復進格鬪不已還改東西班指揮使遷馬步軍副都軍頭太平興國四年命與張紹勣李神祐劉承珪率師屯定州以備北邊俄加秩領演州刺史移屯趙州又從征范陽師還道遇敵戰于徐河斬首千級奪馬百疋雍熙三年命將北征田重進出飛狐道守俊以偏師

為援邊騎雲集守俊按甲從容進戰大敗之連護屯兵于趙定代還掌軍頭引見司淳化三年出為單州團練使又明年改遷齊州時河西蕃部內擾命以副都部署鎮其地既而徙屯石州數改官時有言守俊病且老握重兵不堪其職召還授左領軍衛大將軍領潘州防禦使權金吾街仗大中祥符三年卒年八十一守俊累從軍征討前後中三十六創景德中錄其子允慶為奉職弟守信官崇儀副使守榮內園使

徐興青州人以拳勇得隸兵籍周顯德中從太祖征淮右宋初隸御龍直會平澤潞上其功補控鶴軍使征晉陽部卒壅汾水灌并州城益多其勞還遷本軍副指揮使太平興國初從潘美趣圍柏谷奮與賊鬪有果敢氣人莫能勝生擒偽兵馬都監李美身被重創無所回撓加指揮使太宗征太原討幽薊興從戰屢中流矢以著績聞補天武都虞候累遷秩出為洺州部署初議建方田命興董其事尋復輒端拱中脩鎮定城逾月訖工改

莫州防禦使知靜戎軍歷祁博二州咸平中為涇原環慶十州部署詔督轉靈武芻糧道積石率掠於寇興以步兵畏懼戰不利時王榮援兵不應遂敗走坐削籍流郢州會赦入為右衛將軍遷左監門衛大將軍景德二年卒年六十八

王杲齊州人周顯德中應募為卒從世宗收三關隸先鋒宋初征澤潞平揚州杲應選從行既獲戰功乃拔遷散指揮使累轉馬軍副都軍頭屯并州雍熙中為龍衛

右第二軍都虞候會遣趙保忠還夏州命果引兵護送及還保忠以方物贐果拒不納太宗知之詔賜白金百兩遷右第一軍屯鎮州契丹入寇隸大將郭守文扞城果守北關寇退命督餉橐趣威虜軍還抵徐河時尹繼倫與寇戰小衄果適遇賊河上即按兵拒之殺賊奪所乘馬守文上聞得名見問狀補部軍頭領勤州刺史命監河北有能聲尋命閱教定州諸軍騎射入掌軍頭目引見司李順亂與尹元並為西川招安使敗賊斬首萬

級以功真拜唐州刺史時賊雖平道路尚梗餘黨或保山林以肆姦果與石普等追捕於彭州於是始平至道初乃還復遷靈州副部署道環州留改并州徙知夏州會趙保吉歸欵召還次伏落津移知石州徙石隰副部署未幾以轉餉河西失期降右千牛衛大將軍咸平五年出為亳州永城縣都監被召將入見以疾亟弗果卒年六十四

李重誨應州金城人祖高後唐莊宅使獎州刺史父彥

榮仕契丹署環州刺史重誨嘗為其應州馬步軍都指揮使太平興國五年潘美出師禦寇重誨從其節度使蕭咄李迎戰于代州北嶺大敗美斬咄李擒重誨以獻太宗召見補鄆州馬步軍都指揮使會趙普出鎮奏監州軍雍熙三年召還為武州刺史出為忻州都巡檢緣邊十八砦招安制置使賜服帶鞍馬北兵寇邊重誨以所部邀戰敗之獲羊馬鎧甲甚衆賜詔嘉美會嶺蠻叛改廣桂融宜柳州招安捉賊使聽便宜從事至道初累

遷涇原儀渭鎮戎軍鈐轄咸平三年徙邠寧環慶路坐  
轉餉靈武不嚴斤候至積石為虜騎掠於道營部大亂  
除名流光州五年起為內殿崇班鄜延駐泊都監俄遷  
崇儀使景德中趙德明既納欽或言以麟府謀有他志  
上以涇原地要兵衆慮有緩急遂徙重誨為鈐轄復遷  
益州改皇城使大中祥符六年卒年六十八重誨純慤  
寡過真宗悼其沒於遠土命其子乘傳往護柩歸聽止  
驛舍之別次子禹謨錄為將作監主簿弟重睿歷官澄

州團練使子禹偁閣門祇候

白守素開封人祖延遇仕周至鎮國軍節度父廷訓宋初為龍捷都指揮使領博州刺史守素以蔭補東班承旨太平興國五年遷補右班殿直以善射授供奉官帶御器械三遷至供備庫使咸平三年春契丹犯邊命與王能戍邢州俄又與麥守恩石贊領先鋒禦之敵退復與荆嗣督河北京東捕賊四年命為鎮州行營鈐轄領騎兵攝大陣西偏屢當格鬪俄改定州鈐轄復徙鎮州

王繼忠之陷也宋師還渡河敵人乘之守素據橋有矢  
數百每發必中敵不敢近遂引去真宗與輔臣議三路  
禦賊咸曰威虜扼北道要害尤甚請分騎兵六千屯之  
命魏能為部署上曰能頗強復尤難共事聞守素久練  
邊計張銳性頗和善參知戎務庶克相濟乃命守素銳  
為鈐轄戍順安以貳之景德元年契丹侵長城口守素  
與能發兵破之追北過陽山斬首級獲器械甚衆賜錦  
袍金帶俄徙屯冀州轉運使劉綜舉其智勇材任將帥

加領康州刺史又提騎卒戍靜戎軍兼涖營田之役俄  
為鎮定鈐轄是冬契丹復內侵守素敗其前鋒獲車重  
又入敵境俘擒甚衆及請和省邊戍之職與曹璨留任  
鎮定追叙前勞加合州團練使大中祥符三年命副李  
迪使契丹守素居邊歲久名聞北庭頗畏伏之上慮其  
不欲行密遣內侍詢於守素守素頓首感咽即以崔可  
道代焉再遷南作坊使大中祥符五年卒上甚惜之常  
賄外別賚錢五十萬令護喪還京師錄其一子官

張思鈞邢州沙河人祖中正漢澤州刺史思鈞少善擊  
劒挽強善博奕初應募為卒晉開運間遷廣銳軍使周  
廣順初從聶知遇攻河東破其衆三千餘從向訓東征  
為捉生將擒小校張萬于江猪嶺又從符彥卿與并人  
圍代州留為南北兩關巡檢宋初補龍衛指揮使李繼  
勲下遼州戰帶甲祠斬首萬餘級追奔至長城擒其將  
莫山鮑淑掠人騎二百餘俄屯潞州合戰三十餘乾德  
中以勞秩遷都虞候開寶三年郭進田欽祚戍三交嘗

從戰於石嶺關斬首萬五千餘級閻門祇候齊延琛苗  
泉陷軍中思鈞鼓勁騎突入奪還何繼筠入晉境思鈞  
隸麾下拔南橋徑度大將之出必辟為先鋒太平興國  
初屯定州領兵援磁窑戰敗其衆身中五十創奮不顧  
乃逐賊薄軍城奪馬及鎧甲居多未幾邊人復攻逆戰  
城下斬首萬餘級上嘉之命賜服帶領河州刺史雍熙  
三年邊人寇河間劉廷讓會戰君子館命思鈞翼從時  
天大寒弓不得彀援兵不至於是敗績陷留軍中數年

役役不得還端拱初自契丹始逃歸授澄州刺史知齊  
州思鈞以武進素不知民政僅踰月即徙濮鄆濱棣州  
巡檢至道中改鄜延巡檢使會葺右堡砦擊寇走之未  
幾寇逼保安軍與曹璨往援進躡五十餘里至木場寇  
乃遁去真宗即位徙益州鈴轄兼綿漢九州都巡檢使  
咸平中以王鈞之亂出兵保綿州賊陷漢州思鈞進攻  
克之斬偽刺史苗進又與石普敗賊彌牟砦巴西尉傅  
翹有善馬思鈞求之翹不與思鈞平賊心恃功居多召

朝至責以轉餉後期斬之上聞其事傳召付御史臺鞫治罪當斬特貸之削籍流封州六年起為左司禦率府率考城監軍車駕幸澶淵召詣行在命李繼隆石保吉同議兵事賜服御有加景德二年為西京水北都巡檢使俄分司西京召對行在上憫其老授唐州防禦副使徙鄭州大中祥符二年再遷左千牛衛將軍四年七月卒年八十九子承恩為三班奉職思鈞起行伍征討稍有功質狀小而精悍太宗嘗稱其樓羅自是人目為小

樓羅焉

李琪河南伊闕人幼生長兵家得給事宣祖左右太祖以材力稱進備執御及受禪命補鎮職太宗在京府復令事之由是累遷効忠都虞侯開封府馬步軍副都指揮使領富州刺史嘗請對自言經事太祖而京師無居宅太宗以官第假之琪性素鄙歷事三朝而行不加修每分遣士卒守護闕梁必覬其贈遺視所厚薄為重輕太宗知之遂改授屯衛大將軍領郡如故乃顧曰吾欲

置琪於無過之地爾加左武衛大將軍景德中以老且病表求五日一赴起居俄為臺諫所糾令赴常參真宗念其舊特賜給月奉以養大中祥符元年卒年八十四王延範江陵人形貌奇偉喜任俠家富於財父保義為荊南高氏行軍司馬兼領武泰軍留後高從誨奏署延範太子舍人後隨從誨孫繼冲入觀薦為大理寺丞知泰州累遷司門員外郎太平興國九年為廣南轉運使性豪率尚氣尤好術數嘗通判梓州有社先生以左道

惑衆謂延範曰汝意有所之我常陰為之助延範心喜  
敢為恣橫後為江南轉運使有劉昂賣卜於吉州市其  
言多驗謂延範曰公當偏霸一方又有徐肇為延範推  
九宮筭法得八少一肇驚起曰君侯大貴不可言當如  
江南李國主前戎城主簿田辨自言善相謂延範曰君  
是坐天王形頻伽眼仙人鼻雌龍耳虎望有大威德猛  
烈富貴之相也即日當乘四門輦至是有豹入其公宇  
噬傷數吏從者皆恐慄不敢進延範獨拔戟前逐刺殺

之益以此自負與廣州掌務殿直趙延貴將作監丞雷說會宿觀天象延貴指西方一大星曰此所謂火星入南斗天子下殿走者也雷說出星經證之乃太白行度經南斗延貴謬為火星也延範日夕與掌市舶陸坦議欲發兵會坦代歸延範寓書左拾遺韋務昇為隱語偵朝廷機事延範奴視僚屬峻刑多怨會懷勇小將張霸給使轉運司延範因事杖之霸知延範與知廣州徐休復不協詣休復告延範將謀不軌及諸不法事休復馳

奏之太宗遣高品閻承翰乘傳會轉運副使李琯暨休復雜治延範具伏與鼎辨坦俱斬廣州市籍沒延範家務昇除名配商州延貴等皆抵罪賜霸錢十萬

論曰紹斌從征討凡踰百戰未嘗以為憚屢被廢斥未嘗以為懼太祖宥盜馬罪引見賜予屈法使過用能致其力也榮薄事親下詔督過瓊折州卒足以釋妖惑王果辭艤于夏思鈞拔身自歸當斬而貸琪以鄙稱守俊興輩以勇得備給使守素久練邊計人頗畏伏重誨雖

將略不足亦有可稱大抵武夫悍卒不能無過而亦各有所長略其過而用其長皆足以集事至於一勝一負兵家常勢顧其大節何如耳若榮也薄其所生大節虧矣屢以罪黜宜哉

宋史卷二百八十